

**Azizah Mohd Dun Kembali Jadi Timbalan Menteri Persekutuan
Bernama
15 May, 2013**

KOTA KINABALU, 15 Mei (Bernama) -- Datuk Azizah Mohd Dun kembali menganggotai Kabinet persekutuan apabila dilantik Timbalan Menteri Pembangunan Wanita, Keluarga dan Masyarakat.

Bekas Menteri Pembangunan Masyarakat dan Hal Ehwal Pengguna Sabah itu sebelum ini pernah memegang jawatan Timbalan Menteri Perumahan dan Kerajaan Tempatan.

Kemenangan pada pilihan raya umum 5 Mei lepas menewaskan Datuk Seri Lajim Ukin di Parlimen Beaufort dengan majoriti 673 undi membolehkan beliau kembali ke pusat dan diberi tanggungjawab sebagai timbalan menteri.

Bekas penuntut Maktab Sabah itu pernah melanjutkan pelajaran ke England di peringkat A Level sebelum mengikuti pengajian undang-undang sehingga memperoleh Bachelor in Laws dan ditauliah sebagai peguam di Lincoln Inn's England.

Sekembalinya ke Sabah, Azizah menjadi wanita pertama menjadi Majistret pada 1981 dan memegang jawatan itu hingga tahun 1984.

Pada 1985, beliau menceburkan diri dalam bidang politik dan menang kerusi Dewan Undangan Negeri Klias. Bagaimanapun, setahun kemudian beliau kalah dalam pilihan raya namun masih bergiat aktif dalam politik.

Pada 2004, beliau bertanding di Parlimen Beaufort dan dilantik Timbalan Menteri Perumahan dan Kerajaan Tempatan Malaysia.

Pada pilihan raya 2008, Azizah bertanding dan menang kerusi DUN Klias yang menyaksikan beliau menganggotai Kabinet negeri Sabah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=950063>